

編按：曹敬亭生於亂世，常以說書道盡岳飛、文天祥、荊軻、屈原、高漸離等人的事蹟。鍾愛羅菁，卻被拒愛，從此改名柳敬亭。及後遇上妻子離世，兒子被大水淹沒。

選段為《說書人柳敬亭》第二幕，柳敬亭獲邀到何家說一台書，賀明天何母榮壽。就在這天收到難民即將湧入的消息，原來是清兵追李闖的敗軍，鎮守官兵怕清兵借機說難民中混雜闖賊，乘機搶掠，故將難民趕出鎮外。難民走來向何家求救，望何老爺收留老弱婦孺。柳敬亭獻計，提議難民和何家配合，借祝賀何母大壽，製造萬人空巷的氣勢，嚇怕清兵不敢入鎮，另一邊廂派人請救兵。何老爺先答應柳敬亭和難民，及後卻叫人留夜安排馬車離開。

難一：弊！何老爺成家坐馬車走咗啦！

難三：咁唔得嘍，聽日啲人見唔到佢，實亂晒。

難四：搵人即刻追佢番嚟！

左：馬車走咗，我哋點追呀！

難五：呃得一時唔呃得一世，何老爺就聰明嘞，我哋呢個辦法根本行唔通嘅！

難四：唔係啦，走得幾遠得幾遠，啲清兵可能為咗個鎮的財寶啫，未必有興趣追趕我哋啲賤命嘅。

難二：去南方盡快搵個桃花源。

難三：咁我出去叫埋其他人先。

難四：叫咁多人咪成個鎮都知，我哋靜靜咁走就算嘞！咁多位，要去南方嘅就跟住嚟！

左：哼，咁同何老爺有乜分別？冇膽匪類。

難四：啱，我哋都係一樣，求生啫。

左：求生唔使偷偷摸摸，可以轟轟烈烈嘅！

難四：我哋有得揀咩？走啦！

(部份難民起哄要離開。)

柳： 南隅非我鄉，何為久滯淫？
狐狸馳赴穴，倦鳥盤故林。
顛沛無終極，氣結不能言。

左： 柳先生！

杜： 算啦敬亭！

柳： 禽獸都會記掛自己家鄉，我哋只係識得一步一步咁後退，地圖打開，一個一個城鎮，一條一條河我哋向後退，而最後，一把劍喺地圖上面跌咗落嚟。秦王政，一個霸主嘅眼亦都俾劍光「燦」到擘唔開。荊軻提起魚腸劍，一手捉住秦王嘅衫袖，兩個人都聽到大家沉重嘅呼吸，佢哋知道下一刻將會改變成個歷史。劍光閃動，一聲裂布嘅聲，壯士竟然一擊不中。秦王扯斷衫袖，氣急敗壞圍住條柱走，滿庭文武百官驚惶失措，荊軻大步追上，秦王已經拔出背負嘅長劍，呀！血激射而出。係壯士嘅血。荊軻將魚腸劍掙出，火花喺秦王耳邊爆起，一把短劍深深咁插入石柱之中。悲憤交集嘅壯士睇住秦王矜矜嘅身影，漸漸隱沒係蜂湧而上嘅侍衛後面。佢伸出受重創嘅手，捉住柱上面露出嘅劍柄，用力咁拉、用力咁拉，用力咁拉呢件唔可以改變嘅事實。命運或者唔可以改變，命運或者會吞噬我哋，但係唔可以俾命運侮辱，起碼要伸長手用力咁拉一次！

杜： 飲醉喇你，坐低先啦！

柳： 間屋俾水沖走，我拉過，個仔俾水沖走，我拉過。拉唔住，我有後悔。不過如果有另一隻手……

左： 唔得，我哋今晚就試一次。

難一：試乜嘢？

左： 反擊！我哋有人，有武器，有氣力，點解重要走。

難五：我哋唔係士兵，我哋唔識打仗。

左： 唔係打仗，係保護自己，淨係識得走，家已經冇咗啦，再走，國都冇埋啦。只有反擊，搶番我哋嘅土地。

難四：我哋有機會咩？

左： 唔知，不過我唔想病死或餓死喺河邊。

柳： 哈哈，攞隻手嚟！

（左伸出手。）

柳： 我一直盼望有隻手可以幫我拉把劍出嚟，唔知呢隻係唔係，不過我唔可以再等，柳敬亭條命交俾你！各位，一齊拼一拼呢，哈哈。

左： （攞起一枝旗）重有冇？

（稍停。）

（難二、難一、難三、等逐一拿起旗。）

選段節錄自：張達明，〈說書人柳敬亭〉，佛琳編，《八色風采（香港劇本十年集：九十年代）》，香港：國際演藝評論家協會（香港分會），2003。